



Broj: 01- 4 /12

Datum: 10. januar 2012. godine

BOSNA I HERCEGOVINA  
PARALAMENTARNA SKUPŠTINA  
PREDSTAVNIČKI DOM  
TRG BiH 1  
S A R A J E V O

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
S A R A J E V O

PRIMLJENO: 11.01.2012.god			
Organizaciona jedinica	Klasifikaciona oznaka	Redni broj	Broj priloga
01/a	-50-1-15-16	11	11

PREDMET : Poslaničko pitanje, odgovor, dostavlja se

VEZA: Vaš akt broj 01/a-50-1-15-16/11 od 27.12.2011. godine

Poštovani,

aktom broj i datum veze dostavili ste nam poslaničko pitanje koje je na 16. sjednici Predstavničkog doma Parlamentarne skupštine BiH, održanoj 22. decembra 2011. godine, postavio poslanik Lazar Prodanović.

#### Odgovor na poslaničko pitanje

Agencija za prevenciju korupcije i koordinaciju borbe protiv korupcije upoznata je s najnovijim izvještajem "Transparency International" o korupciji za 2011. godinu. Prema ovom Izvještaju, Bosna i Hercegovina prema indeksu percepcije korupcije zauzima 91. mjesto od 183 zemlje s ocjenom 3,2 na skali od 0 do 10 (10 je stanje bez korupcije, 0 je stanje izrazite korupcije), što je svakako veoma visoka nivo korupcije. Percepcija korupcije izvodi se na osnovu jedinstvenih parametara koje tretiraju javni sektor, a posebno oblasti javnih nabavki, finansiranja političkih stranaka i pristupa informacijama.

Evropska komisija potcrtava prisustvo korupcije u svim segmentima bosanskohercegovačkog društva, pa tako i u privatnom i javnom sektoru, te činjenicu da je Bosna i Hercegovina tek na početku borbe protiv korupcije.

Određeni napredak koji je postignut usvajanjem Strategije za borbu protiv korupcije (2009.-2014.), Akcionog plana za provedbu Strategije za borbu protiv korupcije (2009.-2014.), te usvajanjem Zakona o Agenciji za prevenciju korupcije i koordinaciju borbe protiv korupcije, neznatan je zbog činjenice da se specifične mjere iz navedenog Akcionog plana samo djelimično provode.

Ključni razlog evidentnog zastoja u realizaciji specifičnih mjera iz Akcionog plana je činjenica da je za provedbu većine specifičnih mjera iz ovog dokumenta zadužena upravo Agencija, koja je praktično u fazi osnivanja. Na to je u svom izvještaju ukazao i Monitoring

tim Evropske komisije (EK) u BiH nakon ukidanja viznog režima za Blok 3 (korupcija), koji je kao jednu od opaski iznio i činjenicu da Agencija, de facto, nije postala operativna, "što je u ovoj fazi glavni nedostatak".

Kako je Parlamentarna skupština Bosne i Hercegovine tek na 5. sjednici Predstavničkog doma, održanoj 14. jula 2011. godine, i na 4. sjednici Doma naroda, održanoj 28. jula 2011. godine, donijela Odluku o imenovanju rukovodstva Agencije, koja je objavljena u „Službenom glasniku BiH“ broj 62/11, 2. augusta 2011. godine, sa odredbom o stupanju na snagu osmog dana od dana objavljivanja, rukovodstvo je, praktično, počelo sa radom 10. augusta 2011. godine.

Odmah nakon što smo preuzeli dužnost počeli smo sa izgradnjom institucionalnih kapaciteta Agencije, prije svega, izradom Pravilnika o unutrašnjoj organizaciji i Kodeksom ponašanja uposlenih Agencije, kao dva najvažnija interna akta institucije. Prijedlog pravilnika o unutrašnjoj organizaciji i Prijedlog kodeksa ponašanja uposlenih Agencije urađeni su, i u zakonom predviđenom roku pribavljena su potrebna mišljenja Ureda za zakonodavstvo, Ministarstva finansija i trezora BiH i Ministarstva pravde BiH. Nakon toga, 19. decembra 2011. godine, upućeni su u proceduru davanja saglasnosti Vijeću ministara BiH.

Zbog nepostojanja Pravilnika o unutrašnjoj organizaciji Agencija nije mogla upošljavati osoblje (trenutno su zaposleni samo direktor i dva zamjenika), zbog nepostojanja budžeta BiH Agencija nije mogla unajmiti adekvatan prostor za smještaj (Odlukom Vijeća ministara BiH to je Istočno Sarajevo), kao ni osigurati ostale materijalno-tehničke uslove za obavljanje redovnih zadataka. Zbog Odluke o privremenom finansiranju, kojom su onemogućeni kapitalni izdaci, nisu utrošena ni minimalna sredstva kojima smo raspolagali u zadnjem kvartalu 2011. godine, niti smo imali sredstava za smještaj i materijalno-tehničko opremanje Agencije.

Analizom Akcionog plana za provedbu Strategije za borbu protiv korupcije (2009.-2014.), koji je proistekao iz Strategije za borbu protiv korupcije (2009.-2014.) godine, utvrđeno je propuštanje provedbe 54 specifične mjere, a sve zbog kašnjenja u imenovanju rukovodstva Agencije. Skoro dvije godine od usvajanja Strategije, te godinu i osam mjeseci od stupanja na snagu Zakona o Agenciji, imenovano je rukovodstvo ove institucije.

U skladu s Planom rada za 2012. godinu obavezali smo se da nadoknadimo propušteno, te da izvršimo sve redovne obaveze predviđene Planom rada za 2012. godinu i pomenutim Akcionim planom.

Bez obzira na to što je ovo ambiciozan plan rada, njegova implementacija ovisiće od izgradnje institucionalnih kapaciteta Agencije, a prije svega davanja saglasnosti na Pravilnik o unutrašnjoj organizaciji Agencije od strane Vijeća ministara BiH.

Iz predhodno navedenog možete primijetiti da Agencija, u skladu sa raspoloživim kapacitetima, primjenjuje i provodi Strategiju i Akcioni plan koju je usvojilo Vijeće ministara BiH 24. septembra 2009. godine. Da li će se ocjena percepcije korupcije u BiH popraviti, ne ovisi isključivo od rukovodstva Agencije, već od niza faktora. Prije svega, od podrške Parlamentarne skupštine BiH, kojoj Agencija odgovara i podnosi izvještaj o svome radu, ali i od sveobuhvatne podrške svih segmenta bh. društva – prije svega političke, a zatim i podrške medija i civilnog sektora.

Prema Zakonu o Agenciji za prevenciju korupcije i koordinaciju borbe protiv korupcije („Službeni glasnik BiH“ broj 103/09), Agencija ima nadležnost za prevenciju korupcije i koordinaciju borbe protiv korupcije na svim nivoima zakonodavne, izvršne i sudske vlasti u BiH, u domenu javnog i privatnog sektora na svim nivoima, te u drugim segmentima kao što su obrazovanje, kultura, zdravstvo, sport pa i nevladin sektor.

Do kraja vremenskog okvira koji obuhvata Strategija potrebno je izgraditi kapacitete Agencije, kako bi se na efikasan način sprovedli programi za prevenciju korupcije, educiralo društvo, podigla svijest o rizicima od korupcije, koordinirala borba protiv korupcije, pružila potrebna pomoć nadležnim organima u otkrivanju i provjeravanju slučajeva korupcije, i pokrenuli odgovarajući postupci.

Nemoguće je provesti potrebne reforme u oblasti borbe protiv korupcije bez jake i efikasne institucije, koja bi predvodila i koordinirala sve relevantne aktivnosti.

Vizija je da, nakon što budu osigurani puni institucionalni kapaciteti, Agencija bude glavni koordinator borbe protiv korupcije na svim nivoima vlasti, ali i civilnog društva u nastojanjima da stopa korupcije u BiH bude svedena na najmanju moguću mjeru. Stoga je naša zadaća da BiH, kada je riječ o indeksu percepcije korupcije, dovedemo na razinu približnu zemljama EU.

Međutim, za ovako ambiciozan, ali realan cilj, potrebna nam je sveobuhvatna, a prije svega politička podrška bh. društva, institucionalna odgovornost, kvalitetnija saradnja, strpljenje i, naravno, vrijeme.

Srdačno,

**Dostavljeno:**

- Naslovu,
- a/a.



Istočno Sarajevo 71123, Nikole Tesle bb  
Источно Сарајево 71123, Николе Тесле бб